

ГЭР БҮЛИЙН ХҮЧИРХИЙЛЛИЙН ДУУДЛАГА, МЭДЭЭЛЛИЙГ ХҮЛЭЭН АВЧ ШИЙДВЭРЛЭХ АЖИЛЛАГАА

Г.Бямбадорж

ДХИС-ийн Цагдаагийн сургуулийн

ЦЭЗТ-ийн ахлах багш, магистр,

цагдаагийн дэд хурандаа

Товч агуулга: Цагдаагийн байгууллагад гэр бүлийн хүчирхийлэлтэй холбоотой гэмт хэрэг, зөрчлийн дуудлага мэдээллийг хүлээн авч шалгах ажиллагааны дэс дараалал, алхам, насанд хүрээгүй хүний аюулгүй байдлыг хангах, дуудлага мэдээлэл шалгахад үл хамаарах нөхцөл байдал зэргийг товч дурьдаж өөрийн санал, дүгнэлтээ дэвшүүлсэн.

Түлхүүр үгс: Баримт мэдээлэл, дуудлага, шийдвэрлэх, алхам, шалгах ажиллагаа

Үндсэн хэсэг. Сүүлийн жилүүдэд нийгмийн мэдээллийн хурдац өсөн нэмэгдэж, төрийн болон төрийн бус байгууллагуудаас хүчирхийллийг таслан зогсоох, урьдчилан сэргийлэх талаар сурталчилгааны ажлууд өргөнөөр хийгдсэнээр иргэдийн ойлголт мэдлэг, хандлага өөрчлөгдөж, цагдаагийн байгууллагаас тусламж үйлчилгээ хүсч, энэ төрлийн гэмт хэрэг, зөрчлийн талаарх мэдээлэл нэмэгдэж байна.

Энэ сэдвийн хүрээнд гэр бүлийн хүчирхийллийн дуудлага, мэдээллийг хүлээн авч шийдвэрлэх, цагдаагийн байгууллагын мэдээллийн сан бүрдүүлэх, энэ төрлийн дуудлага мэдээллийн онцлог, шалгах ажиллагааны явцад анхаарах асуудлын талаар нэгдсэн ойлголттой болохыг чухалчилж байна.

Дуудлага мэдээлэл шалгах ажиллагаа

А. Дуудлага хүлээн авагчийн үүрэг:

- Дуудлага, мэдээлэл өгсөн иргэний аюулгүй байдлыг асууж, цагдаагийн ажилтан очих боломжит хугацааны талаар мэдэгдэнэ.
- Аюулгүй байдлыг хангах үүднээс цагдаагийн ажилтан хэргийн газар дээр очтол дуудлага өгсөн иргэнийг утсан дээр барьж байхыг эрмэлзэнэ.
- Мэдээллийн сангаас тухайн айл өрх, дуудлага өгөгч болон хүчирхийлэл үйлдэгчийн мэдээллийг шалгаж, дуудлага шалгах цагдаагийн ажилтанд өгнө.
- Дуудлага, мэдээлэл өгөгч дараагийн дуудлагаараа эхний дуудлагыг хүчингүй болгохыг хүссэн ч эхний дуудлагыг хүчингүй болгохгүй. Дуудлагыг үргэлжлүүлэн шалгаж, талууд аюулгүй байдлыг баталгаажуулна.
- Дуудлага, мэдээллийг цахим санд бүртгэн, дуудлагын бичлэгийг хадгална.
- Дуудлага өгсөн хүнтэй хүчирхийлэл үйлдэгчид оногдуулах хариуцлагын талаар урьдчилан ярилцах ёсгүй.

Б. Хариуцлагатай зохицуулагчийн үүрэг:

- Дуудлага мэдээллийн дагуу ажиллаж байгаа цагдаагийн ажилтнуудын шалгах ажиллагааг зааварчилж, шуурхай ажиллагааг удирдана.
- Утсаар дуудлага өгч байх явцад дуудлага тасарсан, эсхүл түүнийг үгүйсгэсэн шинжтэй мэдээллийг өөр хүн өгсөн тохиолдолд дуудлага хаанаас ирснийг тогтоох, хаягаар нь шалгуулах арга хэмжээг авна.
- Цагдаагийн ажилтны хүргэж ирсэн болон өөрөө хүрч ирсэн хүчирхийллийн хохирогч, хүчирхийлэл үйлдэгч нарын хэрэг, зөрчлийн асуудлыг шийдвэрлэнэ.

- Хүний амь нас, эрүүл мэнд, аюулгүй байдлыг хамгаалах зорилгоор шаардлагатай гэрч, хохирогчийг хамгаалах арга хэмжээг шуурхай авна.

- Гэр бүлийн хүчирхийллийн дуудлага, мэдээлэл шалгасан байдал хангалтгүй бол шалгалтын дүнг хүлээн авалгүй буцааж, зөрчил дутагдлыг арилгуулна.

- Хүчирхийлэгч этгээд гараад зугтсан тохиолдолд албадын ажлыг уялдуулан зохицуулах, зарлан мэдээлэх, эрэн сурвалжлах үйл ажиллагааг ЦБҮАЖ-ын 228-т заасны дагуу цаг алдалгүй шуурхай зохион байгуулна.

В. Дуудлага шалгах цагдаагийн ажилтны үүрэг:

1 дүгээр алхам: (нэвтрэх)

- Дуудлагад хоёроос доошгүй цагдаагийн ажилтан очиж ажиллана.
- Цагдаагийн ажилтнууд өөрсдийн аюулгүй ажиллагааг хангана.
- Аюулын эрсдэлийн үнэлгээ, илтгэх хуудасны маягтыг авч очно.
- Тухайн айл болон иргэний талаарх мэдээллийг сангаас шалгасан байна.
- Хүчирхийлэгчийг зугтах аас сэргийлж тусгай дуут дохиог унтраана.
- Цагдаагийн автомашиныг тохиромжтой газар байрлуулна.
- Дуудлага өгсөн газар орчныг шалгана.
- Гүйцэтгэх үүргийг урьдчилан ярилцаж, ажил үүргээ хуваарилна.
- Хохирогчид аюул учрахаар бол хүч хэрэглэн дотогш нэвтэрнэ.
- Шаардлагатай тохиолдолд нэмэлт бүрэлдэхүүнийг дуудна.

2 дугаар алхам: (шалгах)

- Хойшлуулшгүй ажиллагаанаас бусад тохиолдолд өөрсдийгөө танилцуулна.

- Хүчирхийлэл үйлдэгчид хүчирхийлэл үйлдэх, согтууруулах ундаа хэрэглэхийг зогсоохыг шаардахдаа боломжит хэлбэрээр урьдчилан сануулна.

- Хохирогч, гэр бүлд хамт амьдарч байгаа бусад хүн, хүүхэд, хөгжлийн бэрхшээлтэй хүн, тодорхой шалтгаанаар гэр, орон байранд хамт амьдарч байгаа бусад хүнийг хохирсон эсэхийг шалгана.

- Хохирогчийн сэтгэл санааны байдлыг ойлгож, хүлээцтэй, итгэл төрүүлэхүйц хандана.

- Дуудлага шалгахдаа төвийг сахисан байр суурьнаас харилцаж, өөрийн хувийн үзэл бодол, аливаа дүгнэлт гаргахаас зайлсхийнэ.

- Хохирогч, хүчирхийлэл үйлдэгчийг талууд бие биенээ харахгүй, сонсохгүй, тухайн орчны хүмүүс, хөршүүдээс салангид газар орчинд байлцуулан болсон үйл явдал болон санал хүсэлтийг тодруулж, тэмдэглэнэ.

- Гэр бүлийн хүчирхийллийн шинжтэй үйлдэл, эс үйлдэхүй мөн эсэхийг тухайн нөхцөл байдалд хохирогчийн биед үүссэн гэмтэл, бэртэл, хувцасны урагдал зэргийг ажиглах, гомдол мэдээлэл гаргагчтай харилцан ярилцах, хэргийн газар орчныг шалгах зэрэг энгийн аргуудаар тогтооно.

- Монгол хэл, бичиг мэдэхгүй, хараа, сонсгол, хэл ярианы бэрхшээлтэй хохирогчид орчуулагч, хэлмэрчээр дамжуулан харилцана.

- Хохирогчийн биед учирсан гэмтлийн ул мөр болон эд зүйлийн эвдрэл хэмхрэл бүрийг хуульд заасан журмын дагуу үзлэгийг хийж баримтжуулан, бодитойгоор үнэлнэ.

- Дүрс бичлэг, дуу хураагуур ашиглан үйл явдлыг давхар баримтжуулна.

- Гэмт хэрэг, зөрчил үйлдэхэд хэрэглэсэн эд зүйлсийг эд мөрийн баримтаар хураан авна.

- Шаардлагатай тохиолдолд хэргийн газрын хамгаалалтыг ЦБҮАЖурмын 205-т заасны дагуу авна.

3 дугаар алхам: (туслах)

- Хохирогч, хүчирхийлэл үйлдэгчид хуульд заасан эрх, үүргийг нь тайлбарлаж, хохирогчид үзүүлэх үйлчилгээний талаарх мэдээллийг бичгээр өгнө.
- Шаардлагатай тохиолдолд эмнэлгийн тусламж үйлчилгээнд холбоно.
- Хүчирхийлэлд өртөх магадлалтай хохирогчийг хамгаалах байранд хүргэнэ.
- Орон байрнаасаа хувцас, эм, эмчилгээний хэрэгсэл, баримт бичиг, хүүхдийн сургалтын хэрэгсэл зэрэг нэн шаардлагатай хэрэглээний эд зүйлээ авахад нь туслалцаа үзүүлж, хүчирхийлэл үйлдэгчээс шаардан гаргуулна.

4 Дүгээр алхам: (шийдвэрлэх)

- Гэмт хэргийн шинжтэйгээс бусад тохиолдолд холбогдогчид гэр бүлийн хүчирхийлэл үйлдэгдсэн тохиолдолд эрүүгийн хариуцлага ногдуулж болох тухай сануулна.
- Согтууруулах ундаа хэтрүүлэн хэрэглэсэн этгээдийг албадан эрүүлжүүлнэ.

5 дугаар алхам: (аюулын зэргийн үнэлгээ хийх)

- Хохирогчийн аюулын зэргийн үнэлгээг хийнэ. Аюулын зэргийн үнэлгээг гэр бүлийн хүчирхийлэл үйлдэгдсэн болон үйлдэгдсэн байж болох орчинд эсхүл хохирогчийн байгаа газарт очиж хийнэ.
- Аюулын зэргийн үнэлгээг үндэслэн хохирогчийг нэг цэгийн үйлчилгээний төв, эсхүл түр хамгаалах байранд хүргэх, боломжтой бол төрөл, садан, ойр дотных нь хүний хамгаалалтад өгөх, шаардлагатай бол хүчирхийлэл үйлдэгчийг баривчилна.
- Аюулын зэргийн үнэлгээгээр эрсдэл өндөртэй, эсхүл хүүхэд хүчирхийлэлд өртсөн бол тухайн хохирогч зөвшөөрөл өгсөн эсэхийг үл харгалзан харьяа нийгмийн ажилтанд мэдэгдэнэ.
- Галт зэвсэг, хүчирхийлэл үйлдэхэд ашигласан зэвсэг, зэвсгийн чанартай зүйлийг хураан авна.
- Шалгасан дуудлага, мэдээлэл гэмт хэргийн шинжтэй бол хэрэг бүртгэлт, мөрдөн байцаалтын ажиллагаа явуулахаар цагдаагийн байгууллагад хүргэнэ.
- Цагдаагийн алба хаагч нь гэр бүлийн хүчирхийлэлтэй холбоотой хэрэг, зөрчлийг шалгахдаа холбогдох хууль тогтоомж болон цагдаагийн байгууллагын үйл ажиллагааны журмын код 202, 212-219, 222, 224, 228, 244, 408-т заасныг баримтална.
- Дуудлага, мэдээлэл шалгасан талаар илтгэх хуудас бичнэ.
- Дуудлага, мэдээлэл шалгасан талаар санд мэдээлэл нэн даруй оруулна.
- Дуудлага, мэдээллийг хуулийн дагуу түргэн шуурхай шалгаж буй эсэхэд шууд удирдах дарга нь хяналт тавьж ажиллах үүрэгтэй.

Насанд хүрээгүй хүний аюулгүй байдлыг хангах ажиллагаа

- Дуудлага өгөгдсөн газарт насанд хүрээгүй хүүхэд байгаа эсэхийг тогтооно.
- Насанд хүрээгүй хүнд тусламж шаардлагатай эсэхийг тогтооно.
- Насанд хүрээгүй хүнд цагдаагийн байгууллагаас авах гэж байгаа арга хэмжээний талаар энгийн, ойлгомжтой байдлаар тайлбарлан, хүсэлтийг хүлээн авна.
- Шаардлагатайгаас бусад тохиолдолд цагдаагийн алба хаагчаас хүч хэрэглэсэн үйлдлийг насанд хүрээгүй хүнд харуулахгүй байхыг эрмэлзэнэ.
- Насанд хүрээгүй хүнийг хүчирхийлэл үйлдэгчтэй нэг орчинд үлдээхгүй.

Хэрэв хүүхэд өөрийн хууль ёсны төлөөлөгчийн хүчирхийлэлд өртсөн бөгөөд аюулын эрсдэлийн зэрэг дунд болон өндөр, эсхүл дараах нөхцөл тогтоогдвол эцэг эх, хууль ёсны төлөөлөгчийн саналыг харгалзахгүйгээр хамгаалах боломжтой хүн, гэр бүлд

хүлээлгэн өгөх, нэг цэгийн үйлчилгээний төв, түр хамгаалах байр, эсхүл асрамж, халамжийн үйлчилгээний байгууллагад хүргэх арга хэмжээг авна. Үүнд:

- хүчирхийллийг хүүхдийн амь нас, эрүүл мэндэд аюултай аргаар үйлдсэн, эсхүл үйлдэж болзошгүй;
- хүүхдээ барьцаалсан, барьцаалж болзошгүй;
- хүүхдийн эмзэг байдлыг далимдуулан өөрт ашигтай шийдвэр гаргуулах, ашиг олоход ашигласан, ашиглаж болзошгүй;
- хүүхдийг айдас, сэтгэл санааны дарамтад оруулсан, оруулж болзошгүй;
- хүчирхийлэл үйлдэгч согтуурсан, мансуурсан байдалтай, эсхүл байнга согтуурдаг, мансуурдаг бол.
- Хүүхдийг хүнд хүлээлгэн өгөх бол түүнд эрх, үүргийг сануулж, бичгээр баталгаажуулна.
- Хохирогч хүүхэд долоо, түүнээс дээш настай бол хамгаалах боломжтой хүн, гэр бүлийг сонгохдоо түүний саналыг харгалзана.

Дуудлага мэдээлэл шалгасан тухай илтгэх хуудас,гэмдэглэл үйлдэх

Нөхцөл байдлыг сайтар нягталсны үндсэн дээр илтгэх хуудас бичнэ. Илтгэх хуудсанд дараах зүйлсийг тусгасан байна. Үүнд:

Нэг дүгээрт: (нөхцөл байдал)

- дуудлага, мэдээлэл аваад очсон, шалгасан хугацаа;
- хохирогчийн болон хүчирхийлэгчийн анхны байр байдал сэтгэгдэл, тухайн орчин;
- хохирогчийн болон хүчирхийлэгчийн хамаарал;
- хохирогчийн болон хүчирхийлэгчийн бэртэл гэмтэл;
- эмнэлгийн тусламж авсан байдал;
- хүчирхийлэл үйлдэгдэх болсон шалтгаан;
- хүчирхийлэл үйлдсэн арга;
- хүчирхийлэгчийн заналхийлсэн байдал;
- зэвсэг хэрэглэсэн байдал, зэвсгийн төрөл;
- архи, согтууруулах ундаа хэрэглэсэн байдал;
- хохирогч болон хүчирхийлэгчийн хувийн мэдээлэл;
- хүчирхийллийн хэлбэр, үргэлжилсэн хугацаа, давтамж;

Хоёр дугаарт: (авсан арга хэмжээ)

- зураг авч, бичлэг хийсэн байдал;хохирогчийг хамгаалалтад авсан байдал;
- хүчирхийлэгчийг баривчилсан, саатуулсан байдал;
- хохирогчид шаардлагатай эд зүйл авч өгсөн байдал;
- хохирогчийг шаардлагатай байгууллагад холбон зуучилсан байдал;
- хохирогчид эрх зүйн зөвлөлгөө өгсөн байдал.

3 дугаарт: (шийдвэрлэлт)

- аюулын эрсдэлийн үнэлгээ;
- шийдвэрлэсэн байдал;
- илтгэх хуудас хүлээлгэж өгсөн цагдаагийн ажилтан.

Гэр бүлийн хүчирхийллийн гэмт хэргийн дуудлага, мэдээллийн шалган шийдвэрлэхэд анхаарах асуудал

А. Дуудлага, мэдээлэл шалгах:

- Хүчирхийлэл үйлдэгч өөрийн гэр оронд хүч чадалдаа эрдсэн, дээд зэргийн сэтгэл хөдлөлд автсан байдгийг анхаарна
- Дуудлага нь хохирогч болон дуудлагаар очсон цагдаагийн ажилтны аюулгүй байдалд халдах магадлалтай байдаг.
- Хохирогч хүчирхийлэл үйлдэгчид арга хэмжээ тооцуулахыг хүсэж байвч хариуцлага хүлээлгэх болоход түүнийг өрөвдөх, өмөөрөх хандлага заримдаа гаргадаг.
- Хохирогчоос хүчирхийлэл үйлдэгчийн дэргэд тайлбар авч болохгүй. Учир нь хүчирхийлэл үйлдэгч хохирогчийн хүсэл зоригийг өөрийн дохио зангаа, харц, харилцаагаар хорьж, шахалт үзүүлдэг.
- Гэр бүлийн хүчирхийллийн хэргийн онцлогоос үзэхэд хүчирхийлэл нь анхных ч биш, эцсийнх ч биш байдаг бөгөөд хохирогч болоод гэр бүлийн бусад гишүүд хэзээд ч хүчирхийлэлд дахин өртөх эрсдэлтэй байдаг.
- Хохирогч өөрөө хүсэхгүй байсан ч гэр бүлийн хүчирхийллийн гэмт хэрэг шүүхээр орж, хүчирхийлэл үйлдэгчид хариуцлага тооцох ёстой.
- Хохирогчийн амьдралын хэв маяг, хандлага үйлдлийг шүүмжлэх, буруутгасан, мохоосон үг хэрэглэх, үйлдэл гаргаж болохгүй.
- Хохирогчийг үл хүндэтгэсэн, буруутгасан, бодит байдлыг гуйвуулсан, үл итгэсэн, цаашид гаргах хүсэлтийг няцаасан байр сууринаас хандаж болохгүй.
- Хохирогчийг хамгаалах байранд хүргэх тохиолдолд очихоосоо өмнө түр хамгаалах байрны ажилтанд урьдчилан мэдэгдэх нь зүйтэй.

Б. Хүүхдийн аюулгүй байдлыг ханган ажиллахад анхаарах асуудал:

- Эцэг эхийн хооронд болж байгаа хүчирхийллийн зөрчил хүүхдийн сэтгэл зүйд хүндээр тусдаг
- Эцэг эхийнх нь нэгний эсрэг явуулж буй цагдаагийн шуурхай ажиллагаа хүүхдэд айдас төрүүлсэн явдал байдаг
- Хүүхэд болж буй явдлыг хэд дахин илүүгээр хүлээж авдаг
- Хүүхэд эцэг, эхийнхээ талд байж гэр бүлийн нууцыг задруулахыг хүсдэггүй
- Насанд хүрэгчдийн хооронд, тэр дундаа эцэг, эхийн хоорондох хүчирхийллийг харсан хүүхэд айж цочирддог
- Хүчирхийлэл хүүхдийн эрх дураараа байдаг, байх дуртай гэр оронд нь явагддаг.
- Хүүхэд эцэг, эхийнхээ аль алинд нь хандаж чадахаа болиод айдсын мэдрэмжүүдтэйгээ ганцаараа үлддэг
- Өөрөө байнгын айдас, эргэлзээн дунд амьдарч буй эцэг эхийн аль нэг нь хүүхдийнхээ сэтгэл санааны байдалд анхаарал хандуулж чаддаггүй
- Хүчирхийлэл харсан хүүхдүүд үгүйсгэх, зайгаа авах, уурлаж бухимдах зэрэг өөрийн аргаар айдсаа дарж сурсан байдаг

В. Хохирогчийн хандлага:

- Идэвхгүй байдалтай. Дуу гарахгүй, биеэ барьсан, хүчирхийллийн талаарх асуултад хариулах дургүй.
- Үгүйсгэх байр суурьтай. Болсон явдлыг үгүйсгэнэ, хариугүй жаахан зүйл гэж үзэх ба хүчирхийлэгчийг цагдаагаас өмөөрнө, цагдаад уурлана.
- Ууртай. Өмнө нь гомдол гаргасаар байтал цагдаагийн байгууллага хамгаалж чадалгүй ийм байдалд хүргэсэн, хүчирхийлэл болоод дууссаны дараа ирсэн, цаг тухайд нь хамгаалж чадаагүй гэх мэт шалтгаанаас хохирогч ууртай байж болно.
- Айдаст автсан. Цагдаа дуудсандаа хүчирхийлэл үйлдэгчээс айх, цагдаа ирлээ гээд

хүчирхийлэл зогсохгүй байх гэж айх, цагдаа хүчирхийлэл үйлдэгчид итгээд өөрт нь итгэхгүй байх гэж айх, хүчирхийлэл үйлдэгч хүүхдүүдийг айлган сүрдүүлсэн учир хууль цагдаа хүүхдүүдийг нь аваад явчих вий гэж айх, хүчирхийлэл үйлдэгчийг баривчлаад явахад гарч ирээд үйлдэх хүчирхийллээс айх.

Дуудлага мэдээлэл, гомдол шалгахад үл хамаарах нөхцөл байдал:

- хохирогч хүчирхийлэгч этгээд гэр бүлийн харилцаатай эсэх;
- хохирогч хүчирхийлэгч этгээдтэй нэг дор амьдардаг эсэх;
- хохирогчийн биед нүдэнд харагдах гэмтэл бэртэлгүй;
- ажил, нийгмийн байдал болон баривчлан саатуулахад гарах үр дагаврууд;
- хүчирхийлэл үйлдэгчийн урьдчилсан амлалт, харилцан тохиролцсон байдал;
- хүчирхийлэл үйлдэгчийн хүчирхийллийг зогсооно гэсэн аман баталгаа;
- эрүүгийн хариуцлага ноогдуулахаар хэрэг биш юм шиг санагдах гэх мэт.

Дүгнэлт. Гэр бүлийн хүчирхийллийн аливаа гэмт хэрэг, зөрчлийн талаарх нотлох баримтыг цуглуулах, бэхжүүлэх, шалгах, үнэлэх ажиллагаа нь анхан шатны ажиллагаа буюу гомдол, мэдээллийг хүлээн авч шалгах ажиллагаанаас хамааралтай байна.

Гэр бүлийн хүчирхийллийн талаарх гомдол, мэдээлэл нь бусад төрлийн гэмт хэргийн шинжтэй гомдол, мэдээллээс гэр бүлийн харилцаанд үүссэн, нэн даруй арга хэмжээ авах шаардлагатай маш өндөр эрсдэлийг дагуулсан байдгаараа онцлог юм.

Энэ төрлийн хэрэг, зөрчлийг шалгаж эхлэх үед гэмт үйл явдал болоод өнгөрсөн байдгаас түүнийг судлан шинжилж, танин мэдсэнээр өнгөрсөн үйл явдлыг сэргээн тогтоох зорилгыг хангахад гомдол мэдээллийг шалгах ажиллагаа чиглэгдэж байна.

Мөн дуудлага мэдээллийг шалгахдаа тухайн үйлдэгдсэн гэмт хэрэг, зөрчлийн онцлог, мэдээллийг хүлээн авсан цаг хугацаа, хэргийг шалгаж эхлэх үеийн нөхцөл байдал зэргийг харгалзан мөрдөн шалгах ажиллагааны дарааллыг тогтоох ач холбогдолтой байна.

Санал

- Дуудлага, мэдээллийг хүлээн авах, шалгаж шийдвэрлэх үйл ажиллагааны журмын дарааллыг дээр дурьдсан таван алхамын дагуу нэг бүрчлэн гүйцэтгэх;
- Дуудлага, мэдээлэл шалган шийдвэрлэх явцад цугуулж бэхжүүлсэн баримт, холбогдох мэдээллийг нотлох баримтын хэмжээнд үнэлэх;
- Дуудлага мэдээллийн аудио бичлэгийг хуулбарлаж, шалгаж буй эрх бүхий албан тушаалтанд хүлээлгэн авч, гэмт хэрэг, зөрчлийн материалд хавсаргаж хэвших;
- Прокурор гомдол мэдээллийг хүлээн авмагц эрх бүхий ажилтан зайлшгүй хийж гүйцэтгэвэл зохих ажиллагаанууд бүрэн хийгдсэн эсэх, тухайн хэргийн нөхцөл байдалд тохируулан хариу арга хэмжээ авах талаар заавар, чиглэл өгч тодорхой ажиллагааг түргэн шуурхай хангуулахад хяналтаа чиглүүлж ажиллах;